



ԱՄՆԱՅՆ ՀԱՅՈՑ ԿԱԹՈՂԻԿՈՍ ՎԱԶԳԷՆ Ա-Ի ՔԱՐՈՉՐ
ԽՕՍՈՒԱԾ ՍՈՒՐԲ ԷԶՄԻԱԾՆԻ ՄԱՅՐ ՏԱՃԱՐՈՒՄ
(3 Դեկտեմբեր 1989 թ.)

«Յանուն Հօր եւ Որդւոյ եւ Հոգւոյն Սրբոյ. ամէն»:

«Երանի, որ քաղցեալ և ծարսւի իցեն արդարութեան, զի նոքա յա-
ւեսցին» (Մատթ. Ե 6):

«Երանի նրանց, ովքեր քաղցը և ծարաւը ունեն արդարութեան, որով-
հետև նրանք պիտի յագեցնան»:

Սիրելի հաւատացեալ ժողովուրդ,

Այս նշանաւոր պատգամը մեզ է գալիս մեր Փրկչի Քրիստոսի Սուրբ Աւետարանից, բոլորիդ ծանօթ Լեռան քարոզից, երանութիւնների շարքից: Վերջին երկու հազար տարիների մարդկային աշխարհի տարածքի վրայ, յատկապէս քրիստոնէական աշխարհի, ճառագայթում է այս պատգամը: Դատ ժողովուրդներ իրենց պատմութեան ընթացքում, մանաւանդ ծանր օրերին, տագնապալի շրջաններին, գտել են Յիսուսի այս խօսքի մէջ՝ յոյս, քաջալերանք և հաւատք յաղթանակի: Արդարութեան ծարաւի ժողովուրդ-
ների շարքում, ես կասէի առաջին շարքերում, բազում դարերից ի վեր գտնուել է նաև մեր ազգը: Կարծում եմ, սխալուած չեմ լինի, եթէ ասեմ, թէ դարեր շարունակ մեր ազգի պատմութիւնը վկայում է այդ, որովհետև վեպերի, տագնապների, դժբախտութիւնների, ողբերգութիւնների շրջան-
ներին, հայ ժողովուրդը միշտ ապաւինել է Քրիստոսի այս պատգամին: Միշտ ծարաւի մնալով արդարութեան, մխիթարութիւն է գտել ու ապրել անմար յոյսով և հաւատքով, թէ բոլոր դժուարութիւնները յաղթահարելով, պիտի հասնի իր արդար սպասումների իրականացման, պիտի յագեցնայ նրա ծարաւը արդարութեան:

Այս իրողութիւնը ես տեսնում եմ յստակ և ամբողջական կերպով ու հաստատում մանաւանդ մեր ազգի վերջին հարիւր և աւելի տարիների ըն-
թացքում: Այն շրջանում, որ մենք կոչում ենք շրջան ազգային ազատա-
գրական շարժման և ազգային-մշակութային վերածննդի թէ Արևմտահա-
յաստանում և թէ Արևելահայաստանում:

Դուք քիչ թէ շատ ծանօթ էք մեր ազգի պատմութեան և գիտէք, որ անցեալ դարի սկիզբներից մինչև մեր դարի սկիզբները, մեր ժողովուրդը թէ Արևելքում, թէ Արևմուտքում, ապրել է ծանր պայմանների տակ, բռն-
սուկալ պետութիւնների լծի ներքոյ: Սակայն ազատութեան ու արդարութեան

ծարաւը միշտ մնացել է իր առաջնորդող ոգին. մաս որոշ արտաքին պայմանների բերումով մա ծնունդ է տուել հայ ազատագրական շարժմանը:

Այստեղ եւ կուգենայի յիշել և ընդգծել, թէ այս ճանապարհի վրայ բախտորոշ դեր է կատարել ինչպէս հին ժամանակներում, մաս այս անգամ, Հայաստանեայց Առաքելական Սուրբ Եկեղեցին, իր գլուխ ունենալով թէ Ս. Էջմիածինը, թէ Կիլիկեան Աթոռի Կաթողիկոսութիւնը, և թէ կարևոր չափով, Պոլսի հայոց Պատրիարքութիւնը: Նրանք մախակարապետի դեր են կատարել բացելու համար հայոց պատմութեան այս մոր շրջանը: Դեռևս 18-րդ դարի վերջերից մինչև 19-րդ դարի կէսերը հայ հոգևորականները, պայծառամիտ և քաջակորով անձնաւորութիւններ, թէ այստեղ Ս. Էջմիածնում ինչպէս եղել են մշակաւոր Սիմեոն Երևանցի կաթողիկոսը, Ներսէս կաթողիկոս Աշտարակեցի մի մրա աշակերտը, Սուրբ Էջմիածնի միաբան Խաչատուր Աբովեանը և մրանց հաջորդները, Արևմուտքում՝ Կ. Պոլսի յայտնի Պատրիարք Յովհաննէս Կոլոտը, մրա յաջորդը՝ Նալեան Պատրիարք, մաս հայր Ղևոնդ Ալիշանը, Խրիմեան Հայրիկը և ուրիշները, լուսաւոր ճառագայթում են սփռել հայ հոգևոր, կրթական, ազգային կեանքի տարածքի վրայ, հոգեբանական և իմացական գետիներ պատրաստելով ապագայ վերածննդի և ազատագրական շարժման: Հոգևոր և կրթական գործունէութեամբ, զիր ու գրականութեան և դպրութեան տարածումով, տպարաններ հիմնելով, մրանց յաջողութեց արթնացնել հայ ազգի ինքնագիտակցութիւնը:

Հսկայական գործունէութիւն են ծաւալել այս հոգևորականները այդ շրջանում, որի վրայ խարսխուեց ու զարգացաւ ազգային վերածնունդը և ազատագրական շարժումը թէ Արևմտահայաստանում, թէ Արևելահայաստանում: Հայոց ազատագրական շարժումը մի հերոսական դիցազներգութիւն է աշխարհի պատմութեան առջև:

Երբ մեր ազգը գտնուել է մահու-կենաց կացութեանց դէմ յանդիման, երբ կանգնել է իր ժանիքաւոր ճակատագրի առաջ ճակատ առ ճակատ, ինչպէս ասել է մեր ժողովրդի տառապանքի երգիչ Աւետիս Ահարոնեանը, այդպիսի պահերին հայ ազգը արձանագրել է փայլուն յաղթանակներ:

Այս ճանապարհով է, որ վերջապէս փայլատակեց յաղթանակը Սարդարապատի, հիմնուեց մոր շրջանի հայոց առաջին պետութիւնը 1918-ի Մայիսի 28-ին, երկար դարերի ստրկութիւնից յետոյ, որը շարունակուեց Խորհրդային կարգերի հաստատումով և, որը շարունակութիւնն է Հայաստանի գոյատևման ու ճանապարհը դէպի առաւել լուսաւոր ապագայ:

Ահա թէ ինչու ամէն տարի մեր եկեղեցիները և Հայաստանում և արտասահմանում գոհաբանական մաղթանքներ են կատարում թէ Մայիսի 28-ի և թէ Նոյեմբեր 29-ի առիթներով: Այսօր մենք այդ գոհաբանական մաղթանքը պիտի կատարենք սուրբ պատարագի աւարտին:

Այսօր, սակայն, սիրելի ժողովուրդ, մենք բացառիկ կացութեան առջև ենք գտնուում հոգեպէս և ազգովին թէ Հայաստանում, թէ Արցախում, թէ ներքին ու արտաքին սփիւռքում: Վերստին գտնուում ենք մեր ժանիքաւոր ճակատագրի առաջ ճակատ առ ճակատ: Լեռնային Ղարաբաղի վերաբերեալ վերջին իրադարձութիւնները մեզ պատճառեցին և տխրութիւն և յուսախաբութիւն, բայց ոչ հուսահատութիւն: Դուք գիտէք, որ սա է խոր զգացմունքը հայ ժողովրդի ամենուրէք, իբրև հետևանք Լեռնային Ղարաբաղի վերաբերեալ վերջին որոշման Կենտրոնական Դերագոյն խորհրդում: Հայ ժողովուրդը դժգոհ է: Արդարութեան ծարաւի մեր ժողովուրդը

դժգոհ է: Ահա այսպիսի պահ ենք ապրում /մենք ազգովին: Ես չեմ կարող նախատեսել, թե ինչպես կը զարգանան յետագայ դեպքերը, յետագայ իրադրությունները հայ ժողովրդի և յատկապես դարաբաղեան հայութեան հաճար, բայց ինձ թուում է, թէ այս տագնապալի օրերին իսկ, այս երկունքի օրերին՝ հայոց պատմութեան բազմադարեան մատենանում բացւում է մի նոր էջ:

Ժամանակն է, որ ամբողջ հայութիւնը ի Հայաստան և ի սփիւռս սօշ-թարհի, համախմբուի, միանայ և միասնական վճռականութեամբ դիմագրւի այն դժուարութիւնները, այն վտանգը նոյնիսկ, որի առջև գտնուում է աշխարհ մեր Մայր Հայրենիքը: Այդ միասնութիւնը պէտք է արտայայտուի ոչ միայն խօսքով կամ կոչերով, այլ գործնապէս: Հարկ է իմաստութեամբ ու խորամտութեամբ որոնել գործելու լուսադոյն ճանապարհները, լուսադոյն եղանակները բոլորիս սուրբ նպատակին հասնելու համար: Այս առաջադրանքը ես հեռագրեցի արտասահմանի մեր բոլոր եկեղեցական կենտրոններին Դեկտեմբերի 2-ին:

Երևի դեռևս երկար ժամանակ մենք այս տագնապալի կեանքի մէջ գտնուենք: Պէտք է գործենք համարձակութեամբ, արդար պահանջատերի գիտակցութեամբ, ի հարկին նաև խոհեմութեամբ ու համբերութեամբ, բայց միշտ նոյն հաւատքով ու սպասումով, որ արդարութեան ծարաւ ունեցողներ պիտի յազենան:

Բոլոր հայերը անխտիր, սիրտ սրտի ու ձեռք-ձեռքի, աշխարհին թող լահազանգեն, որ Արարատի ստորոտում և Արցախի լեռների բարձունքներում կայ մի ժողովուրդ, որը մարտնչում է վասն մարդու իրաւունքների պաշտպանութեան, վասն իր ազգային ինքնորոշման իրաւունքի պահպանման և վասն ազատ ապրելու իր կամեցողութեան:

Սիրելի ժողովուրդ, սուրբ պատարագից յետոյ, գոհաբանական մաղթանքի պահին, եկէք միատեղ աղօթենք առ Աստուած, որ մեր Մայր Հայաստանը մնայ անսասան և անշարժ, որ մեր հայրենի ժողովուրդը պահպանի իր կեանքի անվտանգութիւնը ու հասնի իր արդար իղձերի իրականացման ափին:

«Երսունի որ քաղցեալ և ծարաւի իցեն արդարութեան, զի նոքա յագեցին»:

Օրհնութիւն և խաղաղութիւն ընդ ձեզ. ամէն:

